



REPUBLIKA E SHQIPËRISE
MINISTRIA PËR EVROPËN
DHE PUNËT E JASHTME

Ministri Bushati takon homologen suedeze Wallström: dinamikë në rritje e marrëdhënieve dypalëshe

2017-05-04 21:13:00



Ministri i Punëve të Jashtme Ditmir Bushati priti sot në takim Ministren e Punëve të Jashtme të Mbretërisë së Suedisë Margot Wallström, në kuadër të vizitës së saj në Shqipëri. Kjo është vizita e parë e një ministri të jashtëm suedez që nga viti 2006, e cila përkthehet me një rritje të bashkëpunimit midis dy vendeve gjatë viteve të fundit.

Ministrat analizuan dinamikën në rritje të marrëdhënieve dypalëshe në të gjitha fushat duke i dhënë prioritet bashkëpunimit ekonomik dhe shanseve për edukimin dhe punësimin e të rinjve në sektorë të ndryshëm. U vlerësua vijimësia e kontributit në rritje të Suedisë për Shqipërinë përmes projekteve zhvillimore dhe asistencës së dhënë në sektorë të ndryshëm.

Ministrat i kushtuan vëmendje të veçantë procesit të integritimit të Shqipërisë në BE dhe u pajtuan për ndikimin transformues që ka politika e zgjerimit në vendet e rajonit të Ballkanit. Ministri Bushati informoi mbi hapat dhe masat e ndërmarra nga Qeveria Shqiptare dhe vlerësoi rolin mbështetës të Suedisë në mbështetje të procesit të Zgjerimit. Ai shprehu mirënjohjen për kontributin e vazhdueshëm të qeverisë suedeze në procesin e reformave transformuese në Shqipëri dhe konfirmoi vendosmërinë e qeverisë shqiptare për progres të mëtejshëm në zbatimin e reformës në drejtësi.

Ministrja Wallström vlerësoi përpjekjet e qeverisë dhe theksoi rëndësinë e vijimësisë së reformave, duke veçuar zbatimin e reformës në drejtësi. Ajo shtoi se zbatimi i ligjit të vetting-ut dhe dialogu politik brenda institucioneve lidhet ngushtë me ecurinë e integritimit evropian të vendit. “Ne besojmë se e ardhmja e Shqipërisë është në Bashkimin Europian”, shtoi ajo. Në këtë kuadër, ajo informoi se më 29 maj 2017 do të mbahet në Stockholm Konferenca e Dytë për Integritimin e Ballkanit Perëndimor.

Ministrat diskutuan gjithashtu mbi

situatën dhe zhvillimet e fundit në rajon. Ministrja Wallström vlerësoi rolin e Shqipërisë në rajonin e Ballkanit Perëndimor si faktor i qëndrueshëm stabiliteti dhe bashkëpunimi rajonal, si dhe konfirmoi mbështetjen e fortë të Suedisë për Politikën e Zgjerimit të vendeve të rajonit.

Në fund të takimit, Ministri Bushati, me anë të një ekspozite brenda Ministrisë së Punëve të Jashtme, e njohu homologen e tij suedeze me historikun e marrëdhënieve midis dy vendeve.